

De slacht luustren nogal nauw;
 Ai dat met de Franse-slag doot
 Dan vegaloppeern ie oew gauw
 En ging ie dr met in de boot!
 Och twas van oldsher àneleerd
 Hoé of dat alles mos gebeurn,
 Der ging hoas nooit wat vekeerd
 Dat wisse wi'j van te veurn,
 Ai moor wet hoe of ut mos
 tKwam drop an daj op alles let
 Appart hiéln wat was veur wos,
 Dan viel ut ok nog wel wat met.
 Vanzelvers zoj niks vespil'n
 tSlachten bleef een heel gedoé
 En tzol ok nogal veschil'n
 Oft was een varken of een koe.
 Vrögger in mien kindertied
 Koj zo van alles mètmaken,
 tHuusslachten was wied en zied
 Eén van de gewoonste zaken.
 As de slachter weer kommen zol
 Dat zagge wi'j jonges geerne,
 tGing neet um't maken van lol
 Moor as kind wiej alles learne.
 As Wilmoon van de Koppel
 kwam,
 Dat was ter ene dié dat dee,
 Raakten wiej in vuur en vlam
 En waarn smarges al vrög réé,
 Wiej woln wetten hoé ze deen
 Ok hoé 'ndiere-lèven vlood;
 Buuten zoj al vrög alles zeen
 Zowel de geboorte as ok de dood.

Dèn Wilmoom dee was ok boer
 Ging swinters dr bie slachten,
 In mien oge wasse hups stoer
 As ene met veborgen krachten,
 Hi had ok altied grote messe
 In een kokker an zien goddel
 En kreeg uut de klóre-felesse
 Riej tslachten wel een boddel.
 Hi kon zo dreuge wat zeggen,
 Dat stellen wiej hups op pries
 Hee wis ok van weg en steggen
 Kinder vonnen um wereld-wies!
 Wi'j zag'n slachten en inzolten
 Altied àn en waarn dan vol vuur
 tWas'n spanning van vól volten.
 Wilmoom dee alles heel secuur.

Nò't slachten haw van alle sop
 Ok balkenbriej, nog vólle meer,
 Eers mos al ut klein grei op
 tWas wel wat vet een enkle keer,
 Dan grote stukken woor't um
 ging
 As dat spul uut de pekkel kwam
 En ut olmòol in de wiéme hing
 Dan maken wi'j hoaste tam-tam!
 Een volle wiéme was ons geluk
 Vól mooier as een schilderstuk!
 OME JEHAN